

U Sarajevu počeo Svjetski poslovni kongres

Terzić: Bruto domaći proizvod u BiH raste po stopi od šest posto

Reforme počinju djelovati • Stabilnost bankarskog sektora omogućava sigurna inozemna ulaganja

U Sarajevu je jučer počeo 15. svjetski poslovni kongres Međunarodnog udruženja za razvoj biznisa (IMDA). Stotinjak uglednih akademika i poslovnih ljudi iz svih krajeva svijeta tri dana će raspravljati o najvažnijim pitanjima promjenjivog globalnog poslovnog okruženja, saopćava Agencija za promociju inozemnih ulaganja (FIPA).

Poslovno okruženje

Glavni govornik jučer je bio predsjedavajući Vijeća ministara Adnan Terzić. Između ostalog je rekao da je realni rast bruto domaćeg proizvoda (BDP) u našoj zemlji šest posto, odnosno dvostruko veći nego u Hrvatskoj i tri puta veći nego u Makedoniji.

Kada je riječ o stranim ulaganjima, Terzić je kazao da je naš zakon o tome najliberalniji u regionu, a jedan od liberalnijih u svijetu. Istakao je postojanje razvijenog bankarskog sektora, nepostojanje inflatornog pritiska te činjenicu da je preostalo još dosta preduzeća za privatizaciju.



Terzić: Bez inflatornog pritiska

Kao jedan od suorganizatora i sponzora Kongresa, FIPA je dala znatan doprinos održavanju i uspješnom radu ovog skupa značajnog za našu zemlju.

Jačanje privrede

Direktor FIPA-e Haris Bašić pozdravio je prisutne i govorio o mogućnostima stranih ulaganja.

Bašić je opširnije predstavio FIPA-u, dosadašnje aktivnosti i planove.

Ivailo Izvorski iz Ureda Svjetske banke za BiH istakao je da je posljednjih godina postignut znatan napredak i da ekonomske reforme počinju djelovati. Ajgen Jajikolu (Aygen Yayikoglu) iz sarajevskog ureda EBRD-a rekao je da je Evropska banka dosad uložila skoro 600 miliona eura u jačanje bh. privrede.

Abasador Larry Butler, zamjenik visokog predstavnika, podvukao je političku stabilnost, što između ostalog potvrđuje novi kreditni rejting koji je BiH dobila, i otvaranje predstavništva „Microsofta“ u našoj zemlji.

Ugledna svjetska organizacija

The International Management Development Association (IMDA) formirana je 1987. u Pensilvaniji (SAD) kako bi ponudila interdisci-

plinarnu i globalnu platformu za razmjenu ideja te profesionalni rast akademika, biznismena i javnih radnika na svim nivoima.